

Date – 15/10/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Environment, Forest & Climate Change Minister Pu Lalthansânga chuan sawrkâr chu zawi zawiin kawng dik lam panin a inher mêk a ni, a ti.
2. Mizoram Consumer's Union chuan man chawia mipui phur lirthei ten State Transport Authority chuan man bithliah zawm se an ti.
3. India chuan Canada-a sawrkar palai awmte chu Justin Trudeau-a sawrkarah a him tawk lo tiin a ko let.
4. Algeria-a cham mek President Draupadi Murmu-i chuan nimin khan Algerian President Abdelmadjid Tebboune a kawm.



FOREST MINISTER

Environment & Forest Minister Pu Lalthansânga chuan sawrkâr chu zawi zawiin kawng dik lam panin a inher mêk a ni, a ti.

Nimina ZPM Office Aizawl-a party chhunginkhawmah thusawiin Pu Lalthansang chuan Kum 40 dawn sawrkâr lo kal tawh dan chu thawk leh khata thlâk hlawk theih ni lo mahse, zawi zawiin a insiamrem chhoh zêl a, inrenchemna kawngah sawrkâr a kal nasa a, sawrkâr officer-in office a TV an kawl theih dânte leh kalphung thenkhat dangte pawh siam that zel a ni a ti a, Sawrkar hmasain nikum April-August chhûnga a sum pûk chu cheng Vbch 1936.4 a nih laiin, ZPM sawrkârah April - August chhûnga sum an pûk zat chu Rs Vbch 977.7 a ni a, hun bi in ang rengah an lei bat zat chu cheng vaibelchhe sâng chuangin sawrkâr hmasa nen a inthlau a ni, a ti.

Sericulture Department changtu Minister Pu Lalthansanga chuan sawrkâr tharah phai lam mithiamte pawh an phur hle a, mithiam-te'n hmasawna hna thawh kawnga kut rawn thlâk an châk thu sawiin, Muga Project-ah pawh beneficiaries 500 vel thlan an ni dawn a, Mizoram chauh chu ramchung hmarchhaka Muga khawi theihna awm chhun a ni, a ti.

Pu Lalthansanga chuan, tunah hian Chief Minister Rubber Mission chu kalpui chhoh tan niin, Zirtiri Residential Science College hmun hluiah Training Centre buatsaih a ni dawn a ti bawk a, Mizorama sangha thar tam theih dan tur zirna pawh ngawrh taka neih a ni a ti a, "NEC atangin kuhva scope leh a ro siamna tur project an pe dawn a, country of origin certificate dik tak Mizoramin an pe tawh dawn tih a sawi bawk.



TOURISM MINISTER

Tourism Minister Pi Lalrinpuiin Sialsuka khualzin hip thei tur hmun mawi leh nuam tak tak te chu sorkarin theihtawp chhuahin a vilpui ve ang a ti.

Nimina a office chamber-a Sialsuk in rampum huapa ‘Best Tourism Village - Community based category’-a dawn a lawmpuinaah he thu hi sawiin Minister chuan Sialsuk chu khaw nuam tak leh khualzin hip thei tur hmun mawi leh nuam tak tak tamna a ni tih tarlangin, Sawrkar pawhin theihtawp chhuah a chung hmunte chu a vilpui ve tur thu a sawi a. Lawmman dawng thei tura khawtlang mipuite inpekna pawh fakawm a tih thu sawiin, khualzin hip tur chuan thil dang zawng aiin a hmuna cheng mipuite chu an pawimawh a ti.

Khawtlang hruaitute chu an khaw hmun hlute vawng him a an hmalakna entawn tlak tak takte chu chhunzawm zel turin a chah nghal a ni.

He hunah hian Sialsuk VCP Pu R.Lalruatkima leh khawtlang hruaitu dang te an tel a, Sialsuk khua hian Community-based category-a Best Tourism Village Awards 2024 chu Sep thla khan Vice President leh Union Minister for Tourism and Culture-te hnen atangin an dawng a ni.

Minister in lawmman lawmna hun a buatsaihah hian Sialsuk khua a tourism tihchangtlun zel dan turte sawiho nghal a ni.



MIZORAM CONSUMER UNION

Mizoram Consumer’s Union chuan man chawia mipui phur lirthei ten State Transport Authority in a man bithliah zawm loa an pawl rate siam ang zawma an tlan thin chu mipui sum dik lo taka rawkna a ni an ti.

Consumer’s Union chuan hemi chungchangah hian thuchhuah siamin tun hnai chauh nilo tun hma atangin man chawia mipui phur lirthei ten sawrkarin chuan man a bithliah zawm duhlo in an pawl in chuan man an siam angin an tlan thin an ti a, hei hi dan pawisaklohna a ni tih sawiin mipuite rawkna a ni an ti a, STA rate siam anga tlan tha duh lo te laka dan anga action lak mumal a awm thin loh avangin lirtheia sumdawngte an pawngpawrh zel thin a ni an ti.

Thuchhuahah ah chuan danin mipui dinhmun harsatna hrethiama sawrkar in lirthei chuan man a bithliah ang zawm hram hram turin an ngen tih sawiin Sawrkar pawh mipui tana ding an nih angin dan bawhchehhe tute lakah dân anga action la ngam turin an ngen tih an sawi bawk.

STA chuan March thla khan thuchhuah siamin man chawia mipui phur lirthei service, taxi, Autorickshaw leh Maxicab te chuan man a bithliah thar a, 2-Wheeler taxi chu kilometre 1 ah cheng 30 niin, kilometre khat hnuah erawh KM tinah cheng 20 zel a ni ang a, Taxi pangai ah KM 1 ah cheng 55 niin, hemi hnuah KM tinah cheng 45 zel a ni ang a, Autorickshaw chuan man chu Km khar ah cheng 35 niin, a hnu KM tinah cheng 25 zel a ni ang a, Maxicab chu metal road a a tlanin, KM 1 ah cheng 3.50 leh metal road lo ah cheng 4 a ni dawn a ni.



ZPM

ZPM President Pu Lalliansawtachuan, tun hnaia Assam Rifles Biak In, party office atâna chhuh sak tuma mi thenkhatin ZPM party an puhna chu thuthang diklo a ni a ti a, hetiang sawitu hian ngaihdam dil an phut tih a sawi.

Nimina an party office inkhawmah thusawiin Pu Lalliansawta chuan Party office hmun tur atan Assam Rifles Biak In chu a sawi pawh an sawi ri ngai lo a, an inrawlh lo a ti a, an inrawlh ang zawnga thu tithangtu, mipui hruai kawi tumtute chuan ZPM party chungah ngaihdam dil ngei rawh se, a ti.

Pu Lalliansawta chuan, Sorkarna an chan hnuah Party Office nei lo ta chu, Party Office neih a tul thu an sawi fo a, an rilruah hual sa leh biak mek pawh an nei a, amaherawhchu Assam Rifles Biak In chu an sawi ri ngai lo hrim hrim a ni, a ti.

Pu Lalliansawta chuan Assam Rifles chu lo insawn chhuak dawn ta pawh nise, an ram chhunga Biakin aia hmun tha leh remchang zawk hmun tam tak beisei tur a awm ngei ang a ti a. Hetiang puhtu hi mi rilru hruai kawi tuma politics a in beih nan an hmang a, a pawi hle a ni, a ti.

Pu Lalliansawta chuan hetiang zawnga politics khelhi hi ram hlui zia dik tak a nih thu sawiin, ram hlui zia hmanga politics khelhi hi mipuiin an kham tawh a ti bawk.



MNF PR

MNF Party Thalai President Pu Robert Romawia Royte, MLA chuan ZPM sorkar chu Mizo hnam khawih thil pawimawh tak tak ngaihthah ah a puh a,

Nimina MNF Party Office Mizo Hnam Run a thu a sawi naah Pu Robert Romawia chuan Mizoram leh Myanmar inkara zalen taka inkalpawh phalna Free Movement Regime (FMR) hlih chungchangte, Myanmar ramri hung chungchangte, thenawm ram leh state atanga Mizo raltlan ngaihven chungchangah te, Assam nena ramri chungchangah te Sorkar anga Mizo hnam humhalh a tul em em laiin ZPM Sorkar chuanmipui beisei angin hma ala lo a ti a, Chief Minister in vairam media thleng thleng in heng hnam thil chungchangah hian dawih aw a chhuah chu a pawi tak zet a ni, a ti.

Pu Robert Romawia chuan Mizo khaw hlun tak Phuldungsei khuaa Mi 85 te Mizoram ration card atanga ZPM Sorkar in a paihchhuak chu a runthlak takzet a ni a ti a. Heng Phuldungsei khuaa India ram dan anga an Ration Card leh Adhaar card Online a link vek tawh a ni, sorkar hian an Adhaar Card nen an Ration Card nen Online in zawm leh vat turin an phut tih a sawi a ni.

MLA chuan tunlaiin dawt leh thudik famkimlo a lengvel nasa a, thudik puanzar tam a tul tak zet a ni a ti bawk.



CBC

Mizoram Health & Family Welfare Department chuan Mpx leh natna chhuak thar mipuiten an report theihna tur Community-Based Surveillance System (CBS) an tlangzarh.

Health Department thuchhuah tarlan danin Mpx leh natna dang chhuak thar report theihna tur hi kar hmasa khan Health Department Secretary Pi Sangchhin Chinzah chuan a tlangzarh a, he hunah hian Mpx in ramchhung leh khawvel hmun hrang hrang a nghawng dan zir ho a ni bawk.

Community-Based Surveillance (CBS) in a tum chu mipui vantlangin hrileng awlsam taka report leh natna hrileng rang taka zawnehhuah a ni a, CBS hi mipui vantlang hriselna kawnga hmasawna min pe tura Central sorkar-in kalphung thar a duan a ni a, rahbi thar pawimawh tak anih angin hman a awlsam a, sum sen a ngai lova, a hmangtute tan a him bawk a, mi zawng zawng hman theih tura duan a ni bawk. He system thar hman hian Khua leh Veng kilkhawr ber thlengin hrileng an hriat zung zung theih mai bakah kawng hrang hranga hmalak a awlsam phah dawn a, mipuiin hriselna kawngah an dawn tur rang takin kawng hrang hrangah an dawn theih phah dawn a ni.

WHO chuan kumin August ni 14 khan “Mpox” chu natna hlauhawm ah puangin ram hrang hrangin ralkhêl dar an khawng a, tuna Community-Based Surveillance System hman hian he natna ni a rinhlelh te pawh hi report nghal tur a ni dawn a, mi tu pawhin report an pek theihna turin Link hi thehdarh tura ruahman a ni bawk.

Health Department chuan state chungah natna hrang hrang lo thleng thei reng anih avangin engpawh hmachhawn thei turin an inring reng tih an sawi bawk.



INDIA RECALLS DIPLOMATS IN CANADA

India chuan Canada-a sawrkar palai awmte chu Justin Trudeau-a sawrkarin a venghim tha tawh lo tiin a ko let vek. Tuna Canada sawrkarah hian rinna a neih loh thu sawiin nimin tlai khan Canada sawrkar aiawh pawh New Delhia Ministry of External Affairs chuan a ko a. Hemi hnu hian Canada sawrkar aiawha rawn awm High Commissioner hna chelh lailawktu Stewart Ross Wheeler, Deputy High Commissioner Patrick Hebert, First Secretaries Marie Catherine Joly, Ian Ross David Trites, Adam James Chuipka leh Paula Orjuela-te chu hnawhchhuah an ni a. Tun thla ni 19 hmaa India chhuahsan tura hriattir an ni.

MEA chuan Canada sawrkarin Indian High Commissioner leh mi pawimawh dangte bituma an chungah puhna hrang hrang a siam chu a dem thu a sawi a. Hetianga Canada sawrkar thiltih hian tharum thawhna leh firfiaka chetna hlauhawm tak lakah an himna a ti derthawng niin a ngai a ni a ti.

Hemi hma hian sawrkar chuan Canada-a pawikhawihna chhui mekah India aiawh palaite chu ngaihven ngai tia sawi an nih avangin a dem thu na takin a sawi tawh a ni. ni.



PRESIDENT MURMU

Algeria-a cham mek President Draupadi Murmu-i chuan nimin khan Algerian President Abdelmadjid Tebboune a kawm. Ram pathum tlawh tura zinchnuak President Murmu-i hian a hmasa ber atan nimin khan Algeria a thleng a. Algeria President nen hian an inkawm bakah hian India-Algeria ram aiawh mi pawimawhte an inkawm zui nghal a. Khawvel thilthleng, politics leh eibar zawna lama thil pawimawh tak tak an sawiho a ni.

Thuchhuah intawm an siamah President Murmu-i chuan India President zingah Algeria tlawh hmasa ber a ni thei chu lawmawm atih thu a sawi a. Ram pahnihten thu pawimawh tam tak an sawi dun tih sawiin India chuan Algeria nena inlaichinna tha an neih mek chu ti nghet zel tur leh sundawna lamah pawh huangzauh zel a duh a ti bawk. Algerian President Abdelmadjid Tebboune pawhin

President Murmu-I nen khawvel thilthleng mek West Bank, Lebanon, Ukraine leh Israel chungchange an sawidun a ti a. India leh Algeria chuan remna leh muanna an duh ber tih an sawilang a ni a ti bawk.

